

Dados relatados 12 Maio 2021

SUMÁRIO

- Ministério Saúde relata tan kazu foun hamutuk **840** dezde kazu relata ikus iha loron (05.05.2021) – no lori total kazu COVID-19 relata iha Timor-Leste hamutuk **3,626**. Paciente hotu baixa ona iha facilidade tratamento no isolamento iha Vera Cruz, Tasitolu, Tibar, Lahane no oteis ba isolamento no sentru isolamento seluk ne'ebé governu identifika. MS mós aprova ona ba kazu balun hodi halo isolamento iha uma de'it. Ba informasaun detallu refere ba seksaun atualizasaun epidemiolojiku ba relatório ohin nian.

To'o ohin loron, 12.05.2021 – Laboratório Nasionál Saúde hala'o ona teste COVID-19 **80,803** inklui amostra sira ne'ebé rekolla husi rastreiu ba kontaktu iha munisípiu afetadu sira.

- Ekipa vijilánsia sira halo ona investigasaun klean no rastreamentu kontaktu. Ba informasaun kompletu liután kona-ba kazu foun bele hare iha pájina Facebook Ministério Saúde, [Palacio Das Cinzas](#)
- Faze daruak imunizasaun COVID-19 hahú ona iha munisípiu Dili iha loron 10 Maio 2021. Iha faze ida ne'e, sei fó prioridade ba – ema ho moras króniku ka komorbidade, no sira ne'ebé idade 60 ba leten no pesoál liña frente.

- Ministério Saúde ho apoiu husi OMS no UNICEF hahú semana ida ne'e nia laran, continua ho ativu hala'o atividade sensitizasaun no advokasia tama sai uma (*door to door activity*). Ba faze ida ne'e sei fó prioridade ba ema sira ne'ebé iha moras ko-morbidade no idozu ho tinan 60 ba leten no ba pesoál liña frente sira.
- MS nia ekipa vijilánsia pilar 3 ho apoiu husi OMS no parseiru sira hala'o vijilánsia sentinela ativa iha fatin sira ne'ebé detetadu COVID-19 iha munisípiu Dili.
- MS anuncia tan kazu óbitu COVID-19 dalima iha loron 9 Maio 2021. Feto ho idade 70 detekta pozitivu COVID-19 bainhira tama ba facilidade Vera Cruz iha loron 5 Maio 2021 ho moras sindroma respiratória aguda no *anemia grave*.

SITUASAUN IHA NÚMERU

Total no kazu (foun) iha Timor-Leste

3626 konfirmadu (foun **840**)

1894 recupera (foun **526**)

1727 kazu ativu

5 mate

(Bazeia ba dados ne'ebé pública iha [Ministerio da Saúde](#))

Tuir pájina WHO Timor-Leste [Facebook](#) no [Twitter](#) no [MS](#)

Ba informasaun klean liután no guia husi OMS kona-ba surtu atual Moras Coronavirus – 2019 (COVID-19) bele asesu iha [ne'e](#).

SITUASAUN GLOBÁL

Total kazu (foun) iha loron hitu nia laran

Globalmente

157 362 408 konfirmadu (**5 517 602**)

3 277 834 mate (**90 242**)


- Pilar 7 husi MS ho apoiu husi OMS hala’o avaliasaun tékniku hodi hasa’e kapasidade sentru izolamentu, PKI no kapasidade ba kuidadu intensivu iha Ospital Referál Covalima no Maliana.

ATUALIZASAUN EPIMEDIOLOJIKU


- To'o loron 12 Maiu 2021, kazu COVID-19 hamutuk 3,626 ne'ebé maka relata ona iha Timor-Leste. Númeru kazu hirak ne'e aumenta makaas dezde inisiu fulan Marsu 2021. Fatores balun alende virus ne'ebé da'et ba ema barak maka medida sira hanesan rastreiu masal no mós halo rastreiu ba sidadaun sira ne'ebé tama mai liu dalan ilegal iha munisípiu fronteira tolu (Bobonaro, Covalima no Oecusse), kapasidade iha munisípiu Dili hodi halo rastreiu ba kontaktu husi kazu konfirmadu sira no pasajeiru sira ne'ebé halo pedidu hodi teste atu sai ba munisípiu seluk (hanesan parte ida husi "serka sanitaria"). Foin lalais ne'e, kazu barak mak detetadu sein hatene nia ligasaun klaru husi kazu nia huun ka hetan moras ne'e husi se. Hanesan hatudu ona husi indikadór oi-oin katak, Timor-Leste konsidera tama ona iha senáriu **"transmissaun iha comunidade"**.



Data notifikasaun kazu foun no kumulativu COVID-19 iha Timor-Leste
(Kazu Foun-129 Kumulativus-2653)




- Karaktéristiku husi kazu sira ne'ebé relata ona, maioria kazu mosu iha grupu idade entre 20 – 29, tuir ho grupu idade 30 – 39, no idade 40 – 49. Divizaun ba jéneru husi dadus ne'e hatudu katak kazu hirak ne'e kona ba liu mane sira kompara ho feto.



- Iha munisípiu 13 ne'e relata hotu ona kazu konfirmadu COVID-19, maibé kazu barak liu husi Munisípiu Dili.


Distribisaun tuir Munisípiu: Kazu pozitivu

Dili : 2277 | Munisípiu seluk : 376




- Prestasaun servisu labotaróriu aumenta di'ak ba beibeik. Dezde inisiu pandemia to'o loron 12 Maiu 2021, Laboratóriu Nasionál Saúde (LNS) no laboratóriu iha ospital referral sira hala'o ona teste PCR hamutuk 80,803. Durante loron serbisu nian, lor-loron LNS halo teste maizumenus 1200. No foin lalais ne'e, rezultadu teste PCR bele hetan iha oras 24 nia laran.

Total Teste Laboratóriu – numeros kumulativus (Semanal)




- Haree ba número teste ne'ebé aumenta lor-loron, nunez mós ho número kazu pozitivu aumenta ba beibeik, no ida ne'e refleta mós iha *daily test positivity rate* husi kazu pozitivu sira. *Daily test positivity rate* atuál ne'e ho média 9%, ho nia tendénsia (*Sigla Ingles: trend*) aumenta. Ida ne'e hatudu katak epidemia ida ne'e sei aumenta tan.



- Kazu insidénsia kuaze ema nain 48 pur kada populasaun 100,000 (48/100,000) durante loron 7 nia laran, ne'ebé maka aas liu nasaun seluk hanesan Indonezia no Tailândia. Númeru reproduisaun 1,1, ne'e signifika katak virus ne'e sei da'et iha populasaun nia leet. Kompara ho nasaun seluk hanesan Indonezia no Tailândia ne'ebé iha rejiaun iha ho Timor-Leste, númeru kazu hirak ne'e relativamente iha nivel transmisaun ne'ebé aas tebes.

Kazu Insidénsia no Númeru Reproduisaun



(Fontes: OMS SEARO, 11 Maiu 2021)

PROGRESU KAMPAÑA IMUNIZASAUN COVID-19

Ba faze 1 kampaña imunizasaun COVID-19, atinji ona alvu 119% husi doze 24,000 ne'ebé mai husi alokasaun COVAX nian, ne'ebé maka vasina ema 28,597 ba doze dahuluk nian. Ida ne'e posivel tanba utiliza hotu doze extra ne'ebé iha kada frasku vasina nian.

Faze tuir mai husi kampaña imunizasaun COVID-19 hahú ona iha loron 10 Maiu 2021, doze husi vasina hirak ne'e hetan doasaun husi DFAT, Governu Australia.

Progresu Kampaña Imunizasaun COVID-19

to'o loron 05/05/2021 9.00am



OMS TIMOR-LESTE NIA OBJETIVU ESTRATÉJIKU

- Hapara moras da'et hosi ema-ba-ema inklui hamenus infesaun sekundáriu entre sira ne'ebé maka iha kontaktu besik no pesoál saúde sira, haforsa liután prevensaun transmisaun kazu;
- Haforsa Sistema vijilánsia no aumenta kapasidade laboratóriu hodi detekta kazu COVID-19;
- Garante katak halo tuir duni padraun ba Prevensaun no Kontrole Infesaun (PKI) ne'ebé rigorozu tebes no hasa'e kapasidade ba PKI nian;
- Identifika, izola no kuida ba pasiente; inklui fornese mós kuida óptimu ba pasiente ne'ebé infetadu;
- Halo sosializasaun ba informasaun risku no eventu ba comunidade hotu-hotu no hakotu informasaun la loos liuhosi servisu hamutuk ho parseiru sira.
- Hamenus impaktu sosiál no ekonómiku liuhosi parseria multisetorál.

REKOMENDASAUN NO KONSELLU BA PÚBLIKU

Fase ita-nia liman beibeik

Fase ita-nia liman ho dezinfetante ka fase ho sabaun no bee

Tanbasá? Fase ita-nia liman ho sabaun no bee ka uza dezinfetante sei oho virus ne'ebé hela iha ita-nia liman.

Mantein distánsia fíziku

Mantein distánsia fíziku pelumenus metru 1 (pasu 3) distánsia hosi ita nian a'an no ema seluk.

Tanbasá? Bainhira ema me'ar ka fani sira bele hada'et mós ho turuk-oan sai hosi sira-nia inus ka ibun ne'ebé dalaruma kontamina ho virus. Se ita besik loos ema ne'e, ita bele dada iis tama fali turuk-oan

ne'e, inklui ho virus COVID-19 karik ema ne'ebé me'ar infetadu hela.

Uza maskára bainhira distánsia fíziku la posível

Tanbasá? Bainhira ita iha fatin ne'ebé susar atu mantein distánsia fíziku metru ida ka liu tanba fatin kloot, importante tebes atu uza maskára atu hapara transmisaun COVID-19 nian.

Evita ka'er ita nia matan, inus no ibun

Tanbasá? Ita-nia liman ka'er fatin barak no bele da'et virus ne'e. Bainhira kontaminadu ona, hosi liman bele transfere virus ba matan, inus ka ibun. Hosi ne'e, virus ne'e bele tama ba ita-nia isin no halo ita moras.

Prátika Ijiene Respiratóriu

Tenki asegura ita-boot, no ema ne'ebé besik ita, atu halo tuir ijiene respiratóriu. Ida ne'e signifika katak taka ibun, no inus ho liman sikun ka uza tixu bainhira me'ar or fani. Depois soe kedas tixu ne'e ba lixu fatin.

Tanbasá? Pártikula hada'et virus. Halo tuir ijiene respiratóriu, ita-boot sei proteje ema ne'ebé besik ita hosi virus hanesan inus metin, flu no COVID-19.

Se ita-boot isin-manas, me'ar no dada iis araska, buka lalais tratamentu

Hela iha uma bainhira moras. Se isin-manas, me'ar no dada iis araska, buka lalais tratamentu médiku no telefone uluk. Halo tuir instrusaun hosi autoridade saúde.

Tanbasá? Telefone antes sei permiti pesoál saúde sira atu bele direta ita-boot ba facilidade saúde ne'ebé loos. Ida ne'e sei ajuda proteje ita-boot no ajuda prevene hada'et virus no infesaun seluk.

Buka hatene informasaun no halo tuir konsellu ne'ebé pesoál saúde sira hatoo

Buka hatene nafatin informasaun ba dezvoltamentu ikus kona-ba COVID-19. Halo tuir konsellu ne'ebé ita-boot nia pesoál saúde sira hatoo, husi autoridade saúde nasionál no lokál, ka empregadór kona-ba oinsá atu proteje ita-nia an no ho ema seluk husi COVID-19.

Tanbasá? Autoridade nasionál no lokál sei iha informasaun atualizadu kona-ba karik COVID-19 da'et iha ita-nia área. Sira maka fatin di'ak liu atu hetan konsellu kona-ba saida mak ita tenki halo hodi proteje an.

Proteje ita nia an no sira ne'ebé ita hadomi hosi #COVID19:

- Taka ibun no inus bainhira me'ar
- Labele ka'er matan, inus no ibun
- Evita ba fatin públiku no limita tempu iha espasu ne'ebé taka metin
- Bainhira distansia fíziku la posível, obrigatóriu ba ita atu uza maskára
- Mantein distánsia metru ida ka liu hosi ema seluk
- Hamoos beibeik objetu no fatin sira ne'ebé ita kaer beibeik
- Izola an hosi ema bainhira sente moras no buka tratamentu, bainhira presiza

Ba matadalan kona-ba medida preventiva seluk disponivel iha [ne'e](#).

Informasaun COVID-19 Information no kontaktu média:

- Ministériu Saúde estabelese ona númeru *hotline* – 119 – ba COVID-19 ne'ebé maka ema hotu-hotu bele telephone hodi hetan informasaun relasiona ho COVID-19
- Alende ne'e, [Pájina Facebook MS](#) nian fornese atualizasaun loloos kona-ba desenvolvimentu COVID-19 iha rai laran
- OMS Timor-Leste liuhosi nia [Pájina Facebook](#) no [Twitter](#) mós disemina informasaun kona-ba medida preventiva, pergunta no resposta, *myth-buster* no atualizasaun ikus kona-ba COVID-19 iha mundu tomak no iha rai laran. Ba media no pedidu ba entrevista bele manda ba singhsho@who.int no hasane@who.int